

西夏紀事本末

西夏紀事本末卷二十一

烏程張鑑春治甫著

大順受創

嘉祐八年春三月英宗卽位夏國賀登極進奉人吳宗等至順天門欲佩魚及以儀物自從引伴高宜禁之不可留止廐置一夕絕供饋宗出不遜語宜折之如故事良久乃聽入及賜食殿門訴于押伴張覲詔令赴延州與宜辨宜者延州所遣也程戡授詔通判詰之宗曰引伴謂當一百萬兵遂入賀蘭穴此何等語也通判曰聞使人目國主爲少帝故引伴有此對是失在使人不在引伴宗沮服

治平元年以內侍省押班王昭明爲環慶鈐轄帶御器械李若愚爲涇原路鈐轄令體測蕃情治其訴訟小事與帥議其大事則以

問各許歲一乘駟奏事前世以宦人預邊事而將帥不盡其用及有是命人不以爲便也諫官御史傅堯俞趙瞻言不便後卒罷之

秋九月庚午賜諭夏國主精擇使人不令妄舉詔曰朕嗣守丕圖日新庶政方推大信以協萬邦思與藩屏之臣永遵帶礪之約矧勤王而述職固奕世以推誠而近年來將命之使不體朝廷之意因循規矩之常多於臨時率爾改作旣官司之有守致事體以難從且下修奉上之儀本期效順而君有錫臣之寵所以隆恩豈宜一介于是閒輒以多端而生事在國家之撫御固廓爾以無疑想忠孝之傾輸亦豈欲其如此故特申於旨諭諒深認於眷懷今後所遣使人更宜精擇不令妄舉以紊彝章所有押賜押伴引使臣等亦已嚴行戒飭苟有違越必實典刑載惟信誓之文炳若丹青之著事皆可守言貴弗違毋開閒隙之萌庶敦悠久之好是秋

夏數出兵寇秦鳳涇原抄熟戶擾邊塞弓箭手殺掠人畜以萬計  
司馬光言伏見去歲先帝登遐諒祚遣使者來致祭延州差指使  
高宜押伴入京宜言語輕肆傲其使者侮其國王臨辭自訴于朝  
朝廷不以爲意今諒祚招引亡命黠集兵馬窺伺邊境攻圍堡寨  
驅脇熟戶八十餘族殺掠弓箭手約數千人悖逆如此而朝廷乃  
更遣使齎詔撫諭無乃非文王懷德畏力之意乎

二年春正月始朝廷遣王無忌齎詔責諒祚諒祚遷延弗受詔而  
因其賀正使荔茂先附表自言起兵之由歸罪於邊吏詞多非實  
丁卯復以詔戒侵擾曰朕紹承丕命撫育多方念遐邇之所懷唯  
恩信之是篤迺顧涇秦之道適當蕃塞之交謹封守以有常列部  
加而相望安其生聚積有歲年不圖非意之閒忽此無名之舉侵  
掠堡障蕩焚糧資始成生事之端殊失奉藩之體此雖馳於詔命

復尙滯於使人泊觀奏陳尤異聞聽況先朝之厚德從乃父之再盟仰要日月之臨共固山河之界今輕渝舊約規肆末圖苟非所以致福有邦保名厥後儻未思於遠略終曷釋於疑懷交兵殘民朕豈樂此其涇原秦鳳路一帶熟戶及弓箭手地分宜遵普詔自今不可更行侵擾所掠過生口並須發遣各還住坐其孳畜等各令歸戶下庶二邊之俗得遂耕耘之安而累世之忠更同金石之久永毗王室不亦美歟諒祚終弗聽 冬十月二日賜詔曰詔夏國主據環慶路經略司奏取問無名舉兵近迫大順國家戢威武以安中夏推恩信以待四夷豈欲與眾興勞爲邊生事乃眷西陲之守嗣推累世之忠故於歲時曾無賜與之缺每戒將吏務謹封隅之常所宜恪奉朝彝紹遵先訓爰自近歲頗乖素誠或侵蹂元禁之土田或禁蕩近邊之族帳閒雖形於旨諭久莫悉其事端

載循撫御之方終示含容之體今復大驅兵眾奄至塞垣拒敵官軍蹇酬蕃戶覽守臣之上奏至終食之興嗟豈邪謀之所惑而輕舉弗思將大義之不存而肆惡未已質諸天地既隳乃父之盟殘爾人民殊非有邦之福朕惟自昔罰罪必先陳文告之詞若將囚心猶足凜誓言之事儻終不便安免用懲今特遣齋詔往彼取問到日可具理聞奏十一月甲辰諒祚使人來賀正旦丁未使人來賀壽聖節司馬光言近來諒祚雖外遣使人稱臣奉貢而內蓄姦謀陰以官爵金帛誘中國不逞之人及熟戶蕃部其違拒不從者諒祚輒發兵殺掠弓箭手有住在沿邊者諒祚皆迫逐使人內地三年夏四月夏人寇邊環慶經略使蔡挺擊走之秋九月壬子朔日有食之諒祚舉兵寇大順城入寇柔遠寨燒屈乞等三村柵段木嶺初環慶經略安撫使蔡挺知諒祚將入寇卽遣諸將分屯

要害以大順城堅雖被攻不可破不益兵柔遠城惡命副使總管張玉將重兵守之敕近邊熟戶入保清野戒諸寨無得逆戰諒祚將步騎數萬攻圍大順三日熟戶蕃官趙明與官兵合擊之諒祚衷銀甲羶帽以督戰挺先遣强弩八列於濠外注矢下射重甲洞貫諒祚中流矢遁去復徙寇柔遠挺又使副總管張玉募膽勇三千人夜出擾營賊驚潰挺按視馬練平左通廊延右固華池地形便可城卽遣將護築城成分屬羌三千守之賜名荔原堡遣中使慰勞諒祚退屯金湯聲言益發十萬騎圍大順且出媢詞須已得歲賜復攻圍大順城廊延經略安撫使陸誥止其歲賜銀幣曰朝廷積習姑息故虜敢狂悖不稍加折誚則國威不立因留止不與移牒宥州問故諒祚遂大沮盤桓塞下取糧四反卒不敢入寇又歲儉貧願得賜物因遣使謝罪言邊吏擅興兵行且誅之矣冬

十月癸未遣西京左藏庫副使何次公齎詔賜夏國主問所以入寇之故仍止歲賜銀帛陸誥言不若且賜時服不從先是諒祚入寇韓琦議停其歲賜絕其和市遣使問罪文彥博難之舉寶元康定時事琦曰諒祚狂童也非有元昊智計而吾邊備過當時遠甚亟詰之必服會陸誥策與琦合而諒祚果歸款十一月次公還以諒祚表進帝已臥疾琦扣御榻曰諒祚服否帝力疾顧琦曰一如卿料也諒祚所上表雖云受賜累朝敢渝先誓然尙多游詞歸罪于其邊吏乃復誠約夏國詔曰國家遠撫方域並推恩信不專用武蓋務息民夏國世服忠勞爲國藩衛故於歲時賜與恩禮甚備期于惇守誓約傳之永久不謂累年以來數興兵甲侵犯疆陲驚擾人民誘脅熟戶蕩覆族帳亡失生業被邊數路略無寧歲朝廷姑務含恕不欲遽然生事止令所在移文理辯而夏國終不承稟



乃復多聚人馬直叩大順圍迫城寨焚燒村落張其兵勢以抗官軍不順之狀人神共憤朕獨排羣議特降詔書直究歸由先行詰問今覽封奏所稱受賜累朝敢渝先誓祈卹民氓之患欲見和平之理推心及此良可歎嘉詳觀敘陳尙達誠懿至如屯聚兵馬卽託言是邊上首領攻圍城寨又指說作小可邊事誓詔所載豈容如此況夏國兵甲可都無統制緣邊首領必然不可擅興若向去更有侵犯又復假此爲詞則使朝廷何以信憑盟好必難保守故復諭旨所宜審圖儻欲善繼前勳不渝先志則當專遣使人別貢誓表具言今後嚴誠邊上酋首各守封疆不得黠集人馬侵犯邊上其腳延環慶涇原秦鳳等路沿邊一帶久係漢界熟戶並順漢西蕃不得更行劫擄及徧脅歸投所有漢界不逞叛亡之人亦不得更有招納有渝此約是爲絕好餘則遵依誓詔如此方明效順

以釋眾疑朝廷恩禮賜與一切如舊況緣邊熟戶等朝廷素有約束若不來侵犯必不先起事端畱場之間共期康靖

四年春正月丁巳帝崩使鎮戎軍駐泊都監高遵裕告哀于夏抵宥州下宮夏人遣王盭受命至則吉服廷立遵裕切責之遂易服聽遺命既而具食土官語及大順城事盭曰剽掠輩耳遵裕曰扶傷而遁者非若主邪夏人怒曰王人蔑視下國倣邑雖小控弦數十萬亦能躬執橐鞬與君周旋遵裕瞋目叱之時諒祚覘於屏間搖手使止上聞而嘉之 閏三月甲申夏主諒祚遣使獻方物謝罪請戒飭酋長守封疆如去冬所賜詔旨因復以詔答之曰朕以夏國累年以來數興兵甲侵犯疆陲驚擾人民誘徧熟戶去秋乃復直叩大順圍迫城寨焚燒村落抗敵官軍邊奏屢聞人情共憤羣臣皆謂夏國已違誓詔請行拒絕先皇帝務在含恕且詰端由

庶觀逆順之情以決眾多之論逮此露章之稟命已悲仙馭之上賓朕纂極三初包荒在念仰循先志俯徇乃誠旣自省于前辜復願堅於永好苟奏封所敘忠信無渝則恩禮所加歲時如舊安民保福不亦休哉仍賜絹五百匹銀五百兩 夏六月陝西轉運使薛向言知青澗城种諤招西人朱令陵最爲橫山得力酋長已給田十頃宅一區乞除一班使夸示諸羌誘降橫山之眾詔增給田五頃 秋七月夏國遣使奉慰及進助山陵因諭夏國主令遵守藩儀詔曰詔夏國主朝廷戢兵所以息民施德所以懷遠顧西夏之封守奉累朝之詔書不意近歲以來繼有無名之舉邊隅多擾生聚靡寧乃至去秋忽迫大順雖云報仇於熟戶實亦拒戰于官軍皆謂已萌之情可見不順之蹟先皇帝終務全于國體具往詰其事端洎朕纂承之初尤思撫御之略載覽來章之述有嘉大義

之存矧舊章於宗盟復躬承於忠訓宜念祖先之服益遵藩漢之儀使永無兵革之虞眾遂耕耘之樂自享多福以傳無窮八月戊午復夏人和市又諭夏國主令發熟戶仍不得侵踐漢地詔曰詔夏國主朕修文德所以懷遠人之安戢威武所以廣諸夏之福豈欲爲邊生患與眾興勞今據逐路經略司奏自嘉祐七年春至今秋以來夏國人騎或脅略近邊熟戶或侵踐當界民疇或假以金錢搆亡命之卒或誘以官爵致無賴之夫爲日滋深其害未已朕新膺大統奄宅中區旣思輯藩臣之和又將杜邊事之漸按西平之舊則參慶曆之再盟未肩祖父之忠頗忽朝廷之制緬懷裔土久缺化風豈委任之失人致講陳之非計夫享盛福者莫如躬德義蹈後艱者靡不由僭狂勉循至言庶保先約其前後招脅過熟戶並須盡底發遣過界仍令後不得信縱人騎侵踐漢地致射傷

人命及潛購下第舉人逃背軍卒等所言逐次邊奏因依已具別錄 冬十月癸酉知青澗城种諤襲擄夏監軍嵬名山遂復綏州初邊吏上言西戎部將嵬名山欲以橫山之眾取諤祚以降詔邊臣招納其眾諫議大夫司馬光上疏極論以爲名山之眾未必能制諤祚幸而勝之滅一諤祚生一諤祚何利之有若其不勝必引眾歸我不知何以待之臣恐朝廷不獨失信于諤祚又將失信于名山矣若餘眾尙多還北不可入南不受窮無所歸必將突據邊城以救其命陛下獨不見侯景之事乎神宗不聽至是遣將种諤發兵迎之嵬名山者部落在故綏州名山弟曰夷山請降于种諤諤使人因夷山以誘名山賂以金孟名山小吏李文喜受之陰遣銀夏監軍牙吏史屈子託言嵬名山來報內附而名山未之知也諤卽奏言諤祚累年用兵人心離貳嘗欲發橫山族帳盡過興州

族帳皆懷土重遷其首領盡收河南之地取諒祚以降帝信之陸  
詵言以眾來降情僞未可知戒諤毋妄動諤持之力詔詵召諤問  
狀且與轉運辭向議撫納乃共畫三策令幕府張穆之入奏穆之  
因受向指詭言必可成帝意詵不協力徙之秦鳳諤不待命募可  
使者通蠟書于名山與屈子定計領所部期日會于州諤起所部  
蕃漢兵會于懷遠砦移折繼世赴銀夏應接長驅入綏州夜度大  
理水駐師離思曲圍其帳厥明屈子及諸酋長脇名山開門迎納  
名山驚援槍欲鬪夷山呼曰兄已約降何爲如是文喜因出所受  
金孟示之名山投槍大哭遂舉眾從諤而南名山賜名趙懷順得  
酋領三百戶萬五千勝兵萬人將城其地詵以無詔出師召諤還  
將劾諤擅興之罪欲捕治之未果而徙命至諤軍還次懷柔虜眾  
四萬人全集城下諤出兵擊走之適折繼世亦領兵來會遂築綏

州城西方用兵自此始十一月种諤既受嵬名山降夏主諒祚乃詐爲會議誘知保安軍楊定殺之邊釁復起朝廷以諤生事欲棄綏誅諤陝西宣撫主管機宜文字趙嵩言虜旣殺王官而又棄綏不守示弱已甚且名山舉族來歸當何以處諤無名興舉死有餘責若將改而還之彼能聽順而亡絕約之心乎不若論諚祚以虜眾餓莩投死中國邊臣雖擅納實無所利特以質往年景詢輩爾可遣詢等來與降羌交歸各遵紀律而疆場安矣如其蔽匿則我留橫山之民未爲失也又移書執政請存綏州以張兵勢先規度大理河川建堡砦畫稼穡之地三十里以處降羌若棄綏不守則無以安新附之眾援种世衡招蕃兵破賊屯青澗城故事朝廷從之乃改命韓琦判永興軍經略陝西卒存綏州貶諤四官安置隨州十二月初諚祚凶忍好爲亂舉兵犯慶州大順城乘駱馬張黃

屋自出督戰埤者管勾東路都巡檢司軍馬林廣以礮弩射之中  
乃解圍中創甚馳入一佛祠有牧牛兒不得出懼伏佛座下見其  
脫鞞血流于踝使人裹創舁載而去至其國殂年二十一國人益  
曰昭英皇帝廟號毅宗葬安陵



西夏紀事本末卷二十一

西夏紀事本末卷二十二

烏程張鑑春治甫著

梁氏擅政

慶曆八年春正月夏國主曩霄既歿三月而沒藏太后生諒祚訛  
唃之相諒祚也有梁氏者其先中國人爲訛唃子婦諒祚既長私  
焉日視事於國夜則從諸其初妻訛唃之女沒藏氏與訛唃皆對  
甚謀伏甲梁氏之宮須其入以殺之梁氏知焉私以告諒祚諒祚  
乃使召訛唃執于內室沒藏強宗也子弟族人在外者八十餘人  
悉誅之夷其族以梁氏忠於己因以爲妻又命其弟乞埋爲家相  
許其世襲

治平四年冬諒祚殂子秉常立尙幼而梁氏爲太后自主國事梁  
乞埋死其子移逋繼之謂之沒甯令沒甯令者華言天大王也秉

常之世執國政者有嵬名浪遇元昊之弟也最老于軍事以不附諸梁遷下治而死其時存者三人移逋以世襲居長契次日都羅馬尾又次日關萌訛略知書私侍梁氏移逋萌訛皆以昵倖進唯馬尾但有戰功然皆庸人秉常荒辱梁氏自主兵不以屬其子

熙寧三年秋九月夏賊寇荔原堡李信戰不利關訛堡之築梁氏引兵犯慶州大順城慶帥遣北路巡檢林廣拒守深入牽制賊勢遂破十二盤多娘大原詐娘四寨先是虜圍白豹城不解廣使城兵皆以弱弓弩射之虜度其勢之所及稍稍近城乃易強弓勁弩叢射虜多死遂相擁而潰深入遇賊數千戰敗之因追擊至金湯城又大破走之因毀其城壘引兵歸夜過洛河有賊來襲廣揚聲令軍選強弩數百列岸側實卷甲疾行賊聞之不敢渡時賊圍羅兀城甚急賊得吾禁卒語之曰汝語城中張大吾軍使速降當與

汝爵祿卒敬諾之致卒危梯上下瞰城中卒輒大呼曰西賊人少糧盡朝夕去矣城中堅守之賊怒醢之冬十月夏人寇環慶

四年秋九月夏國主請綏州

五年春賜夏國主乞贖大藏經詔曰詔夏國主省表乞收贖釋典一大藏并簽帙覆帕前後新舊翻譯經文惟覲宸慈特降旨命令有司點勘無至脫漏卷目所有印造裝成紙墨工直並依例進馬七十匹聊充資費早賜近年宣給事具悉維是佛乘著爲象數載覽需章之奏懇求具譯之編已降允俞特行賜予眷言信嚮良用歎嘉所請贖經文已指揮印經所應有經本並如法印造給賜令保安軍移牒宥州差人於界首交割至可領也所有馬七十四匹更不用進來故茲詔示想宜知悉春寒比平安好遣書指不多及是歲以乘常七歲卽位計之才十有二齡耳

元豐四年夏六月夏人幽其主秉常初秉常既不得志常慕中國有李清者本秦人亡虜中秉常昵之用以爲將軍清因說秉常以河南歸朝廷梁氏知之屢勸秉常不行漢禮秉常不從清又爲秉常誘漢倡婦樂人梁氏遂置酒執李清誅之奪秉常政而幽之國人乖亂元豐中梁氏嘗遣將引兵卒至保安軍順寧寨圍之數重時寨兵至少人心兇懼有倡媵李氏得梁氏陰事甚詳乃掀衣登陴抗聲罵之盡發其私虜人皆掩耳併力射之莫能中李氏言愈醜虜人度李終不得恐且得罪遂託以他事中夜引其軍去八年冬十月戊辰夏國主秉常遣使于遼報其母梁氏哀丁亥以夏國主母喪遣使弔祭

西夏紀事本末卷二十三

烏程張鑑春治甫著

綏城易砦

治平四年冬十一月夏主諒祚詐爲會議誘知保安軍楊定殺之邊釁復起十二月己巳夏人求以亡命景詢易嵬名山郭遠曰詢庸人也受之則不得不還名山恐自是蕃酋無復向化矣是月郭遠謂得殺楊定等首領姓名謀告將斬之于境以謝罪遠曰是且梟死囚以給我報曰必執李崇貴韓道喜來夏人言殺之矣遠命以二人狀貌物色詰問敵情得乃錮而獻之判永興軍兼陝西經略安撫使韓琦至永興初辭向郭遠等議欲存綏州詔琦度其可否琦奏賊今已誘殺楊定等綏州不可棄也及諒祚病死其子秉常方幼琦因奏當此變故非棄綏之時

神宗熙寧元年春三月庚辰夏主諒祚殂子秉常立遣其臣薛宗道等來告哀帝遣韓縝詰問宗道以殺傷楊定及擄掠熟戶不遣使賀卽位降詔不承等事宗道言李崇貴等見已禁錮候朝旨卽拘送及陳夏主秉常母子悔過之意帝命縝諭旨恐國主幼小未能戢服沿邊蕃部他日或再來侵犯度彼親任事止三五人欲自朝廷除官仍于歲賜內割五萬充俸及候李崇貴等至方可行冊慰之禮令縝錄本付宗道仍以詔書賜秉常曰惟爾先父保有西陲忽覽訃書良深軫念眷言荼毒情何可任勉勵孝忠用副存撫逮諸親信之列亦同慰諭之懷餘令薛宗道等宣諭及崇貴等至言楊定奉使諒祚嘗拜稱臣且許以歸沿邊熟戶諒祚遺之寶劍寶鑑及金銀物初定歸時上其劍鏡而匿其金銀言諒祚可刺帝喜遂擢知保安軍旣而夏人失綏州以爲定賣已故殺之至是事

露帝薄責崇貴等而削定官沒其田宅萬計 秋七月乙亥名秦州新築大甘谷口砦曰甘谷堡初秦州生戶爲諒祚劫而西徒有空地百里名篳築知州馬仲甫請城而耕之卽大甘谷口砦也是特賜名 冬十月遼遣使冊李秉常爲夏國王十一月秉常遣使羅重進來言主上方以孝治天下奈何反教夏國之臣叛其君朝廷乃罷分賜酋豪之議止令歸塞門安遠二寨還賜以綏州重進凡三往返議之始奉表聽從十二月庚戌乃遣劉航賜秉常詔曰朕肇膺皇曆奄宅萬邦凡撫遠人必推大信乃顧西陲之守實殫累世之忠爰自近來頗隳故矩以至間令首領誘害邊臣寢違憲度之常自絕貢輸之路方行詰問忽報凶哀而能懲事以謝愆滌哀而請命念方罹於荼毒嘗曲示於慰存乃復羈送罪酋載馳使介願堅誠節規欲日新今又奉表及奏已稟從聖旨歸納塞門



安遠二砦仍乞別進誓文永遵臣禮詳覽來請朕意嘉之夏國既再修職貢所宜謹守信誓無或擾犯邊圉重取悔尤至於順漢西蕃亦毋得輒有侵掠候誓表到日卽遣使封冊并以綏州給還所有歲賜自封冊後並依舊例朝廷必當誠飭邊吏約束屬戶各守疆場不得交侵則阜安邊俗式臻富庶之期紹續世封克保寵榮之福時夏人屢欲款塞每虛聲搖邊詔問方略知延州趙高審計形勢爲破賊之策以獻遣裨將曲珍呂眞以兵千人分巡東西路賊方以四萬眾自閒道欲取綏州道遇曲珍皇駭亟戰呂眞繼至賊眾散走賊自失綏州意未能已高揣知其情奏言賊使請和必欲畫綏州界願聽本路經略司分畫歲賜則俟通和之日復焉辛酉以王韶管幹秦鳳經略司機宜文事韶遂行邊西蕃俞龍珂帥其眾內附初韶爲建昌軍司理詣闕上平戎三策以爲西夏可取

欲平西夏當復河湟今古渭之西熙河蘭鄯皆漢隴西等郡吐蕃  
唃廝囉一族國其閒宜併有之以絕夏人右臂帝異其言王安石  
以爲奇謀故詔有是擢夏遣使貢于遠是歲夏改元乾道

二年春正月夏國主乞卑頒封冊詔曰詔夏國主比輸忠款願襲  
世榮已飭攸司式備封冊屬使人之勤請欲誓詔之早頒庶彼邊  
民間我朝命得遂耕耘之便更無兵革之虞所宜允從當體睦遇  
今差某官先齋誓詔往彼至可領也夏人寇秦州陷劉溝堡殺守  
將范愿死傷者不可勝計戊子賜夏國主誓詔曰詔夏國主省所  
進誓表臣聞固基業者必防於悔吝質神祇者宜務於要盟考覈  
彝章討論典故河帶山礪始漢室以流芳玉敦珠盤本周朝之垂  
範庶使君臣之契邦國之歡蔚爲長久之規茂著古今之式矧茂  
恩於累世受賜於有年當竭情誠仰期宸聽竊以上聯世緒累受

列封本宜存信以推忠豈謂輕盟而易動蓋此酋戎之畫助成守土之非然而始有釁端已歸傾逝昨者期在通歡之美曾伸歷款之誠爰降綈函宛垂俞旨敢陳懇悞上達至聰儻給還於一城卽納歸于二砦惟賴至仁撫育鉅德保安冀原舊誓之文用復交歡之永伏遇堯雲廣蔭軒鑑分輝幸寬既往之辜深察自新之懇將使慶流後裔澤被溥天洎垂賜予之常恪謹傾輸之節臣敢不昭徵部族嚴戒酋渠用絕驚駭俾無侵軼非不知畏天而事大勉堅衛國之猷背盟者不祥寅懷奉君之體若乃言亡其實新歲神而共誅信不克周翼百殃而咸萃自敦盟約愈謹守於藩條深愧愆尤乞頒迴於誓詔具悉朕紹承天命盡四海而撫懷之況爾世守西土爲國藩輔者乎今復懲既往之非篤自新之志質於天地要之鬼神載貢誓文納忠王室朕方推大信以示萬邦俯同茲言永

無有易其進納塞門安遠二寨已指揮延州候交割訖卻給還綬州各依舊界仍自行封冊以後歲賜並如舊例其餘約束事節一依慶曆五年正月二十二日誓詔施行朕已戒勅邊吏各守封疆所宜顯諭國人藏書祖廟永保休福詔諸子孫指詞已孚故不多及誓詔付夏國主三月將行冊禮復先以詔曰詔夏國主茲閱函封重申誓約本誠心之自篤爲封守之遠圖朕已飭使人將馳冊禮旣薦綬於世土宜先諭於邊氓庶遂耕耘之私永無兵革之患緬惟忠順當體眷勤冊曰維熙寧二年歲次己酉三月戊辰朔十四日辛巳皇帝若曰於戲昔堯合萬邦而民風和周建列土而王業懋若古申命蓋國家之成法也咨爾秉常迪性純一飾躬靖虔生稟山川之靈舊傳弓鉞之賜撫有西夏尊于本朝知事君必盡其節知守國當保其眾乃內發誠素外孚誓言質之天地而不欺

要之日月而不昧朕用稽酌故典表顯徽寶錫爾以茅土之封不爲不寵加爾以車服之數不爲不榮涓辰旣良備物旣渥誕舉不冊以華一方今遣朝奉郎守尙書司封郎中上輕車都尉賜紫金魚袋劉航文思副使銀青光祿大夫檢校太子賓客兼御史大夫上騎都尉彭城縣開國伯食邑七百戶劉恣持節冊命爾爲夏國主爲宋藩輔夫履謙順者靡不膺長福懷驕肆者靡不蹈後虞率身和民時乃之績往欽哉祇予一人之彝訓可不慎歟 秋七月乙丑朔日有食之戊辰夏遣使詣遼謝封冊八月夏國請從舊蕃儀詔許之詔曰爾世居西垂屏衛中夏旣服朝廷之新命宜從蕃國之舊儀以紹祖風且堅臣節宜依來請用遂乃誠蓋夏國自諒祚請去蕃禮從漢儀之後常服中國衣冠至是始復其初 冬十月城綏州先是乘常旣寇秦州復上誓表請納安遠塞門二砦以

乞綏州上使韓縝與夏人議亦許之矣鄜延宣撫郭達上言曰此正商於六百里之策也非先交二砦不可與綏朝議以爲然然時已有詔使達焚棄綏州達曰一州旣失二砦不可得中國爲夏人所賣安用守臣爲藏其詔不出上言綏州具存且自効違詔之罪詔褒達旣誓詔已降夏人猶不歸二砦夏主遣其臣岡萌訛來言欲先得綏達命機宜文字趙尙如夏交所納二砦且定地界岡萌訛對曰朝廷本欲得二砦地界非所約尙曰然則塞門安遠二牆墟耳安用之二砦之北舊有三十六堡且以長城嶺爲界西平王祥符所移書固在也岡萌訛語塞尙以夏人渝盟請城綏州不以易二砦時陳升之韓琦亦不欲廢事遂格秉常上誓表更賜詔曰詔夏國主所奏差鬼名挨移等赴塞門地分與趙祕丞商量分劃塞門安遠交領綏州雖差人去與趙祕丞一兩次相見終不與定

奪了當兼宥州續得保安軍牒開坐中書樞密院同奉聖旨安遠  
塞門蕃族住坐久已著業應雖起移任令蕃族依舊住坐所有綏  
州更不給還及云豈將邊圉之末圖有抗大廷之誠命願詳悉於  
云爲免稽留於事理等事具悉朕嗣膺丕曆勤撫庶邦凡德澤之  
所加固邇遐之無閒矧惟西夏屏于一方比載覽于誓文尋俯同  
於誠請速按還於舊境忽構述於異端因念二寨之民豈無故俗  
之戀使各安其生聚且曲示於仁恩蓋徇彼情匪樂生事重披來  
奏尙有所陳宜自斥於末圖庶共恢於遠略向都囉重進等齎到  
誓表備詳恭順旣降誓詔遂令延州交割塞門安遠訖卻還綏州  
並須合依舊界及得延州奏夏國遣來人只要交割寨基比移牒  
宥州指說舊日界至回牒卻稱趙高妄有指執顯是不依誓詔交  
割舊界朝廷務悖大體將示含容其二寨已令延州更不交割綏

州固無給還之理自守所宜遵循誓詔永保安靜無令任事首領  
輒起事端遂城綏州改名綏德城延地皆荒瘠占田者不出租賦  
而以爲藩蔽寶元用兵後涸耗殆盡其曠土爲諸酋所有高因召  
問曰往時汝族戶若干今皆安在對曰大兵之後死亡流散其存  
止此高曰其地存乎酋無以對曰吾貲汝歸聽汝自募丁家使占  
田充兵若何吾所得者人爾田則吾不問也諸酋皆感服歸募壯  
夫悉補亡籍又檢括境內公私閒田得七千五百餘頃募騎兵萬  
七千高以異時蕃兵提空簿漫不可攷因涅其手屬歲饑高令蕃  
兵願刺手者貸常平穀一斛于是人人願刺因訓練以時精銳過  
于正兵戊戌以左監門衛將軍崑名山爲供備庫使仍賜名趙懷  
順己未夏遣使來謝冊封 閏十一月戊申夏遣使詣遼乞賜印

綏



三年秋七月夏人寇邊先是虜遣兵二萬侵緄德城尋入堡判延州郭遠曰彼氣力方銳不可與戰又不可止俟其去而平之虜旣成堡各留戍三百人遠遣將攻其两大堡一日克之餘堡遁去時虜人又築堡于慶州荔源堡北曰鬧訛眾號十萬其堡在境外二十里及聞延州堡敗亦止不築蕃部巡檢李宗諒地近虜堡害其田作乃率眾千餘人與虜戰于鬧訛知慶州李復圭合蕃漢兵三千遣裨將李信劉甫种詠郭貴等助之信等訴眾寡不敵按兵不出復圭威以節制親畫陣圖方略授之兵進宗諒戰不利還趨堡信閉門不納宗諒還戰而沒復圭責信觀望信等引兵三千往十二盤擊虜虜曰我與宗諒有仇不與宋兵戰也信曰宗諒我熟戶射之虜曰汝真欲戰耶乃縱西翼圍之且令曰殺兵勿殺將遂大敗復圭懼欲自解乃執信等而取其圖略命州官李昭用劾以故

違節制詠瘐死獄中斬信甫配流郭貴朝廷因命復圭酬賽復圭遣將復出兵邛州破金湯白芍萌□和□等寨夜入欄浪市掠老幼數百人又使李克襲金湯而夏人已去惟殺其老幼一二百人以功告捷而邊釁大起矣八月己卯夏人大舉入環慶攻大順城柔遠砦荔源堡懷安鎮東谷西谷二砦業落鎮兵多者號三十萬少者號二十萬屯榆林距慶州四十里游騎至城下陝西大震時大順清野賊無所掠又毒水上流飲者多死凡九日乃退鈴轄郭慶都監高敏魏慶宗秦勃等死之韓絳請行邊王安石亦請乃以絳爲陝西宣撫使自受命至陞辭三日而行贈金緡及織文袍纁至邊悉與將吏治兵鄜延使种諤出青澗城絳欲自高奴通道河東詔兼河東宣撫使就拜同中書門下平章事冬十月辛酉詔延州毋納夏使夏又大舉入寇環慶堡障皆被圍姚兕駐荔源堡

引兵出據險要及張疑兵諸山上使賊不得散掠境內閒出奇兵擊之賊稍卻明日益兵來攻甚急兕乘高而射凡三百餘發皆應弦而斃指裂血流而射不已更遣子雄率精騎出自執旗從城上麾之賊不敢當卽引而西攻大順城兕復往援城亦獲全兕字武之爲巡檢以功多遷左藏軍副使十一月甲辰夏人寇大順詔知延州郭逵出師援之逵謀知乘常幼留宥州卽遣燕達悉破近邊諸寨聲言擣虛攻宥州凡九戰其酋皆遁又遣田守度出德靖寨伺其歸邀擊之夏人間逵將襲宥州亟奔還守度破之于金湯十二月庚午夏人寇鎮戎軍三川砦巡檢趙普伏兵邀擊敗之夏改元天賜禮盛國慶

四年春正月己丑絳使偏將种諤襲夏人敗之絳素不習兵事開幕府于延安措置乖方選蕃兵爲七軍復以种諤爲鄜延鈐轄知

青澗城信任之命諸將皆受其節制蕃兵皆怨望絳與諤謀出兵取橫山安撫使郭達曰諤狂生耳朝廷徒以种氏家世用之必誤大事絳奏達沮軍事逮還之旣諤帥師襲敗夏人於囉兀絳因命諤以眾二萬築囉兀城及雪中築撫寧堡自高奴通河東塞調發倉卒關陝騷然呂公弼上言諤旣城囉兀又增堡障今大兵殺獲已多虜方懷忿日夜聚兵必爲邊患願罷城築專爲持重計絳又命順德軍判官游師雄同提舉常平劉瑄往鄜延與主帥措議戰守之策初瑄欲自延州入安定黑水堡過綏平塞地逼賊境師雄疑其有伏請由他道已而諤者至言夏人嘗伏精兵數千於黑水傍伺其過掩之將詰以機事瑄驚曰向非公墮于敵矣不聽已而絳言諤入夏之功破賊馬戶川斬首千級乞加旌賞從之三月丁亥夏人陷撫寧諸城初种諤進築永樂川賞捕嶺二砦分遣都監

趙璞燕達築撫寧故城及分荒堆三泉吐渾川開光嶺葭蘆州四  
砦與河東路修築各相去四十餘里絳得空名告身宣勅及錦袍  
銀帶撫納降附至邊盡召蕃官蕃部厚犒之軍士怨望又奪騎兵  
馬曰此輩不能戰以與蕃部有抱馬首號泣者絳又嘗遣權管勾  
機宜文字游師雄按視囉兀城撫寧和市師雄言囉兀無井泉撫  
寧在平川皆不可守已而夏人來攻順寧砦遂圍撫寧折繼昌高  
永能擁兵駐細浮圖去撫寧咫尺囉兀兵勢尙完諤在綏德節制  
諸軍聞夏人至茫然失措欲作書召燕達戰悸不能下筆願連判  
李南公涕泗不已由是新築諸堡悉陷囉兀亦不守將士沒者千  
餘人初上遣戶部副使張景憲等按視景憲受命卽奏曰二城不  
可守臣固不待到而後知行未半道撫寧已陷至鄜延條奏所見  
百姓憔悴師旅咨嗟及言入鄜延界詢囉兀利害無一人言便者

乞速毀廢會慶州軍叛詔棄囉兀城治謬罪謬稱得密旨於高遵裕遵裕降爲乾州兵馬監押而責謬授汝州團練副使潭州安置韓絳坐興師敗衄罷知鄧州王文諒者夏國用事臣沒藏訛噍家奴得罪因自歸王安石薦其才加閣門祇候韓絳先遣文諒出界凡官軍斬級多奪與蕃軍至掘冢戮屍爲功邠寧廣銳都虞候吳達嘗與文諒爭功文諒怨之誣以夜至野移會與賊鬪呼達不至及扇搖軍士宣撫司送達慶州獄四十日絳至慶州將斬達部卒喧呼乃復送獄數日賊攻囉兀甚急絳命慶州出兵牽制廣銳兩指揮謀擁達爲亂雨作不授甲乃止遂焚北門大譟縱略斬關而出林廣說以送順多投降者時達已擁眾出餘黨猶在城下廣諭降之者曰亂首去矣爾曹出非同惡若聽我不惟得活且有功因收集得百餘人至營激厲約束之授以兵器令攻城下兵擒戮皆

盡慶州遂安涇原路總管張玉卹延劉永年並令再任玉與一子  
官樞密使文彥博曰兩人同是用而推恩不同上曰玉累有戰功  
永年但久熟卹延未有代之者若一槩推恩無以激勸 秋九月  
庚子夏主秉常遣使入貢表乞綏州城願依舊約詔答曰昨覽邊  
臣所奏以夏國去秋自絕朝廷深入環慶路殺掠熟戶侵徧城寨  
須舉兵入討朕爲人父母亟令班師無得窮武今國主遣使歸款  
欲繼舊好休兵息民甚善綏州前已降詔更不令夏國交割塞門  
安遠二寨綏州更不給還今復何議止令卹延路經略司定立綏  
德城界其餘及諸路並依見今漢蕃住坐耕牧界至立封墩掘塹  
內外各認地分樵牧耕種貴彼此更無侵軼俟定界畢別進誓表  
回頒誓詔恩賜如舊因並賜陝西河東經略使司詔曰勅夏國再  
差鬼名懷寨等進誓表謝恩朝廷已降詔並依慶曆五年正月二

十二日誓詔施行又賜卹延等路經略使不得生事詔曰勅夏國再差都羅重進等齎到誓表及進納安遠塞門二寨詞理恭順朝廷已降誓詔並依慶曆年誓詔施行十二月戊午歸夏俘

五年秋又詔陝西毋侵掠夏境時夏人已進誓表故有是命詔曰詔夏國主省所上表臣依准制命將綏德城下界至打量二十里明立封堠交付了當訖者臣幼叨世緒遵奉皇猷宿兵累年空阻瞻雲之望通盟此日遐陳獻土之歡上奉高明更無渝變虔遵聖訓分定式置踐土約詞昭著先朝之誓推忠納款堅持歸信之誠載圖方岳之勤庶答乾坤之施具悉世膺爵寵爲我翰藩來陳封章率服詔令載惟忠順良所歎嘉弭兵息民子育萬國終始惟一時乃朕心爾不有渝朕無過舉已戒邊吏各守封疆所宜顯諭國人永遵先誓其餘約束事節一依慶曆五年正月二十二日誓詔



施行自今以後恩禮歲賜並如舊例故茲詔示想宜知悉復賜立  
夏國主冊文曰維某年月日皇帝若曰古先哲王奄有區夏選賢  
維世以立諸侯外則撫鎮畛封內則屏毗中國肆朕纂服適追令  
猷敷考貢圖誕頒顯冊咨爾某性資沈勇世載忠良夙懷來極之  
誠深明事大之節底綏種落式遏寇虞奉承前修嗣守舊約是用  
策勳而懋賞備物以嚴師績茂旃旌苴茅分土涓辰令吉長于西  
陲今差某官持節冊命爾爲夏國主於戲世爲宋藩惟忠實可以  
保位亶以戎索非信順無以乂民允懷于茲罔墜厥緒欽哉迪予  
一人之休命可不慎歟

西夏紀事本末卷二十四

烏程張鑑春治甫著

五道西征

神宗熙寧五年春二月丙寅以知鄭州呂公弼爲宣徽南院使龍圖閣直學士知渭州蔡挺爲樞密副使因險築熙寧砦謀告夏人數萬集胡盧河挺出奇兵迎擊之遂潰遣四將分路追討破其七族夏人復犯諸砦環慶兵不能禦挺遣張玉以萬人往解其圍慶州軍變關中大擾挺討平之帝曰慶卒爲亂不至猖獗涇原之力也時以燕達權發遣環慶路駐泊總管慶州之役達有戰功故自鈐轄躡遷總管然自資淺故令權發遣自燕達始也

達字逢辰初達爲延州巡

檢成懷靈砦羌人三萬滿城以所部五百破之故有是命

六年春二月辛卯夏人寇秦州都巡檢使劉維吉敗之

七年夏四月乙亥王韶破四蕃結河川族斷夏國通路

八年是歲夏改元大安

元豐元年秋八月壬子王珪知帝欲伐夏故奏乞用集賢殿修撰  
俞充爲邊帥

二年秋七月乙酉夏兵犯綏德城平等四將高永能等擊敗之八  
月丙申朔夏人寇綏德城都監李浦敗之

三年秋七月庚寅熙河路經略司言西界首領禹臧結逋藥蕃部  
巴鞞等以驛書來告夏國集兵將築撤逋達宗城于河州界黃河  
之南洮河之西帝曰若如所報乃屬河州之境豈可聽其修築深  
慮經略司不詳上件所指地分都爲無備驅逐約闕次第可速下  
本司多備兵馬禁止之

四年夏六月壬午詔陝西路緣邊諸路累報夏國大集兵至須廣

爲之備以東上閤門使文州刺史种諤爲鄜延路經略安撫副使  
應本司事與經略安撫使沈括從長處置先是諤入對大言曰夏  
國無人乘常孺子往持其臂而來爾帝壯之乃決意西征命諤副  
括本路及麟府事悉聽諤節制 秋七月命李憲等分道伐夏國  
初環慶經略使俞充知上有用兵意屢請西伐又言諜報云夏國  
母及梁相公者勸秉常不行漢禮秉常不從因囚之且秉常事大  
有何可罪乃被幽囚此正興師問罪之時今若一舉而復漢唐兩  
河之地其費不過五年歲賜秉常之數乃除充環慶帥至環慶議  
取靈武書奏而充暴卒乃以高遵裕代之因命高遵裕出環慶劉  
昌祚出涇原李憲出熙河种諤出鄜延王中正出河東分道並進  
八月辛酉夏人寇臨州堡詔吐蕃首領董璚集兵會伐董璚集六  
部族兵十二萬分三路與大兵會壬戌种諤遣諸將出界遇賊破

之斬首千級丁丑熙河經略李憲總熙秦七軍及董種兵三萬建  
大將旗鼓節制諸軍敗夏人于西市新城獲酋首三人首領二十  
餘人庚辰又襲破于女遮谷斬獲甚眾遂復古蘭州城奏至上甚  
喜唯种諤帥軍次綏德城遣將出師招納遇賊境上朝廷以諤先  
期輕出命還師延安改命諤知麟府事並聽王中正節制憲以蘭  
州古金城地是爲河湟要害請城之仍建爲帥府九月乙酉董種  
遣使來貢且言已遣首領將兵三萬會擊夏國戊子蘭州新順首  
領巴令謁等三族率所部兵攻夏人撒逋宗城敗之丙申熙河路  
都大經制司言蘭州古城東西約六百餘步南北約三百餘步大  
兵自西市新城約百五十餘里將至金城有大閘五六重僅通人  
馬自夏賊敗衄之後所至部族皆降附今招納已多若不築城無  
以固降羌之心見築蘭州城及通過堡已遣前軍副將苗履中軍

副將王文郁都大管勾修築前軍將李浩專提舉固根本其李浩以須佐事之人亦卽軍前權選委勾當种諤乞計置濟渡橋棧令轉運司發步乘運入西界詔凡出兵深入其濟渡過索渾脫皆須自備未聞千里運木隨軍令諤及河賊界屋並可毀或斬林木相兼帝之坐制兵間利害細微皆得其要丙午詔諭夏國勅勝曰睦茲西夏保有舊封爰自近世以來尤謹奉藩之職忽姦臣之擅命致弱主之被囚迨移問其端倪輒自隳於信約暴驅兵眾直犯塞防在神理之莫容固人情之共憤方切拯民之念宜興問罪之師已遣將臣諸道並進其先在夏國主左右并鬼名諸部同心之人並許軍前拔身自歸及其餘首領能相率效順共誅國讎隨功大小爵祿賞賜各倍常科許依舊土地住坐子孫世世常享安榮其或違拒天兵九族並誅無赦蓋天道助順必致萬靈之歸王師有

征更無千里之敵咨爾士庶久罹困殘共肩向化之心咸適更生之路敢稽朕命後悔何追是日王中正發麟州禡祭祝詞曰臣中正代皇帝親征兵六萬人民夫亦六萬餘人行數里至白草平卽奏已入夏界留屯九日不進遣士卒往來就芻糧于麟州高遵裕發慶州蕃漢步騎凡八萬七千人民夫九萬五千人种諤以鄜延兵五萬四千畿內七將兵三萬九千分爲七軍方陣而進自綏德城出塞丁未攻圍米脂寨庚戌夏兵救米脂皆鄜延經略副使种諤率眾擊破之諤因乞不受王中正節制上以其米脂之功大喜遣使撫諭曰昨以卿急相滅賊恐或妄進爲一方憂欲俾王中正節制進止今乃能功先諸路朕甚嘉之自今可不受中正節制辛亥諤又敗夏人于無定川斬首八千級冬十月丁巳米脂皆降初圍米脂城虜以眾十萬來援前鋒將高永能謂從弟承亨曰虜

眾暴至易吾軍吾營當大川右山左水宜令前設嚴陣待其至選  
精騎張右翼擊之可破也永亨從之詰朝霧四塞虜果大至與前  
軍戰良久奇兵翼進虜潰自相蹈襲于無定河水爲不流大軍乘  
之自寅至辰斬首數千級獲馬三千橐駝牛羊以萬計器甲不可  
勝數城猶不下永能密遣謀埋都統說其東壁守將諭以禍福翼  
日來降永能請厚賞之衣以歸示諸下導以鼓吹城中乃攜其僞  
鈐轄令介遇訛出降种諤下令入城敢殺人及盜者斬收城中老  
小萬四百二十一口給以衣巾仍命訛遇等各統所部以禦敵庚  
申熙河兵至女遮谷夏人遇戰敗之癸亥种諤至石州賊棄積年  
文案簿書枷械舉眾遁走移軍據之乙丑涇原兵至磨臍隘遇夏  
兵與戰敗之先是詔涇原兵聽高遵裕節制仍令環慶與涇原合  
兵擇便路進討夏人之謀者以爲環慶阻衛山必從涇原取胡盧



河大川出塞故悉河南之力以支涇原既而環慶兵不至劉昌祚與姚麟率本路蕃漢兵五萬獨出離夏界堪哥平十五里遇夏人三萬餘眾扼磨臍隘口不得進諸將欲舍而東出韋州與環慶合昌祚曰遇賊不擊枉道自全是謂無次且爲客利速戰古今所聞公等去此自度能免乎麟曰賊眾我寡將迎擊之且以臨大軍之聲必濟卽馳騎中軍告急憲進兵麟使人聲言姚公已破賊乃謀分軍度胡盧河奪隘牌手當前神臂弓次之弩又次之選鋒馬在後諭眾以立功者三倍熙河之賞眾驩甚響震山谷昌祚旣挾兩牌先登弓弩繼前麟鼓而出與夏統軍國母弟梁大王戰自午至申夏人小卻大軍奮至夏人遂大敗追奔二十里斬獲大首領十五級小首領二百十九級擒首領統軍姪吃多埋等二十二入斬二千四百六十級獲僞銅印一自是大軍通行無所礙戊辰知夏

州索九思遁去种諤入夏州己巳种諤入銀州庚午環慶行營經略高遵裕將步騎八萬七千出慶州與夏人戰敗之復通遠軍种諤遣曲珍率兵通黑水安定堡路遇夏人與戰破之是日內侍王中正率涇原兵至夏州時夏州已降种諤諤尋引去中正軍于城中居民數十家先是朝旨禁入賊境抄掠夏人亦棄城邑皆走河北士卒無所得皆憤悒思戰謂中正曰鄜延軍先行獲功甚多我軍出界近二旬所獲才三十餘級何以復命且食盡矣因渡無定河循水北行地皆沙濕士馬多陷沒糗糧不能繼又恥無功乃請襲宥州聊以藉口中正從之癸酉王中正至宥州城中居民五百餘家遂屠之斬首百餘級降者十數人獲馬牛百六十羊千九百軍于城東二日殺所得馬牛羊以充食高遵裕至韋州監軍司令將士勿毀官寺民居以示招遠乙亥李憲敗夏人屈吳山丙子鄜

延路鈴轄曲珍破夏人于蒲桃山高遵裕次旱海先是李察請以  
驛代夫運糧驢塞路饋不繼師病之己卯种諤言效順人已刺歸  
漢二字恐諸路在臣後者一例殺戮乞賜約束詔种諤所過招納  
效順人令王中正如行營經過指揮諸將更加存撫辛巳涇原節  
制王中正入宥州涇原兵既破磨臍隘行次賞移口有二道一北  
出黛黛嶺一西北出鳴沙川鳴沙少紆諸將欲從黛黛嶺劉昌祚  
曰離漢時運司備糧一月今已十八日未到靈州倘有不繼勢將  
若何吾聞鳴沙有積粟夏人謂之御倉可取而食之靈州雖久不  
足憂也既至得窖藏米百萬爲留信宿重載而趨靈州壬午師次  
城下有番酋乘馬馳突昌祚曰孰能爲我取此賊乎時郭成爲選  
鋒卽躍馬斬其首以還先是昌祚率番漢兵五萬受高遵裕節制  
令兩路合軍伐夏至是環慶軍未至城門未闔先鋒奪門幾入高

遵裕疾其功遣李臨安鼎齋劄子止之且曰已使王永昌入城招安可勿殺昌祚按甲不敢進少間門闔城守斬首級四百五十得戰馬牛羊千餘昌祚曰城不足下獨嫌于環慶爾朝廷在遠必謂兩道相爭乃止十一月癸未朔日有食之高遵裕遂以環慶兵趨靈州是日次南州平濼距城三十里遇夏人遵裕出精兵接戰斬首千餘級轉運副李察判官范純粹夜以手書閒道促涇原兵來援劉昌祚卽委姚麟留屯自將選鋒數千人赴之未至而賊已退先是昌祚言軍事不稱旨帝賜遵裕手札曰昌祚所言迂闊必若不堪其任者宜擇人代之遵裕由是輕昌祚旣而昌祚先至靈州城下或傳昌祚已克靈州遵裕未至靈州百里聞之亟具表稱臣遣昌祚進攻拔靈州城尋知所傳皆虛乃斬謀者以徇于是昌祚詣遵裕遵裕訝其來晚坐帳外移時不見旣見問靈州何如昌祚

日疇昔卽欲取之以幕府在後故止城不足拔也前日磨臍之戰  
餘眾皆保東關鎮東關在城東三十里旁直興州渡口平時自是  
要害今復保聚若乘此急擊之外援旣殲孤城當自下遵裕怒未  
解且方欲攻城謂昌祚曰吾夜以萬人負土平壘黎明入之矣因  
檄昌祚以涇原兵付姚麟麟不敢當遵裕亦已甲申詔降五路對  
境圖付王中正種諤據所分地招討俟略定河南如可乘勢渡河  
方得前進蕩覆賊巢緣環慶涇原行營已至靈州界其鄜延河東  
兵馬路尙遠不須必赴會合但能平靜所分一道將來議賞不在  
克定興靈之下乃令趙高應付糧草初王中正在河東奴視轉運  
司官莊公岳等自中正軍出境應備幾日糧中正以爲鄜延受我  
節制前與鄜延軍遇彼糧皆我有也乃書片紙云可備半月糧公  
岳等恐中道乏絕陰更備八日糧及種諤旣得詔不受中正節制

鄜延糧不可復得人馬漸乏中正不習軍事自入夏境望空而行無嚮導斥候性畏怯所至逗留恐夏人知其營柵之處每夜二更輒令軍中滅火後軍飯尙未熟士卒食之多病又禁軍中驢鳴及食盡士卒憤怒流言當先殺王昭宣及莊公岳趙成二漕乃潰歸初种諤被詔當以兵會靈州而諤在道不進旣發夏州卽饋餉乏絕諤駐兵麻家平士卒饑困皆無人色諤欲歸罪漕臣李稷稷以民苦摺運多散走不能禁使士卒斬其足筋宛轉山谷間數日乃死者數千人丁亥諸軍合攻靈州种諤敗夏人于黑水斬首千七百級戊子高遵裕始自以環慶兵攻靈州城時軍中皆無攻具亦無知其法者遵裕旋令采木爲之皆細小不可用又欲以軍法斬劉昌祚眾共救解之昌祚憂恚成疾涇原兵皆憤怒轉運判官范純粹謂遵裕曰兩軍不協恐生它變力勸遵裕詣昌祚營問疾以

和解之又使呼城上人曰汝何不速降其人曰我未嘗叛亦未嘗戰何謂降也西人亦聞從城上呼官軍曰漢人兀撻否或仰而答曰兀撻城上皆大笑蓋西人謂慙爲兀撻也已丑李憲敗夏人于羅逋川种諤降橫河平人戶因留千人守米脂自帥大眾進攻銀石夏州遂破石堡城斬獲甚眾辛丑師還涇原總兵侍禁魯福彭孫護餽餉至鳴沙川與夏人三戰敗績初夏人聞宋大舉母梁太后問策于在廷諸將少者盡請戰一老將獨曰不須拒之但清塹堅壁縱其深入聚勁兵於靈夏而遣輕騎抄絕其饋運大兵無食可不戰而困也梁氏從之師卒無功而還癸卯种諤至夏州索家平進次白它兵眾三萬人以無食而潰左班殿直劉歸仁率眾南奔相繼乏食復值大雪乃引還死者不可勝計潰而入塞者僅三萬人王中正自宥州行至奈王井糧盡士卒死者二萬人塵坌四

起居人駭散或請閉六戍拒之或議以河東十二將之師討除沈括以爲不然括出按軍劉歸仁至括問汝歸取糧何以不持軍符歸仁無以對乃斬以徇丙午高遵裕以師還夏人來追遂潰是役也遵裕至圍城凡十八日不能下夏人決黃河七級渠以灌營復抄絕餉道士卒多凍溺而死餘軍才萬三千而已夏人蹶之復敗昌祚亦還初詔李憲帥五路兵直趨興靈憲總師東上營于天都山下焚夏之南牟內殿并其館庫追襲其統軍仁多陵丁敗之突于胡盧河屯沒煙會帝始意謂夏童不恭命進軍靈武期於一舉成捷嘗下詔曰如有敢議班師者以軍法從事至於師老儲乏主帥方議班師無敢啟言者有內臣樂士宣方爲小行人之職獨毅然白於帥府請自邊乘驛七晝夕達奏至於京師帝欣然從之憲遂班師時五路兵皆至靈州城下獨憲不至五路之出也姚麟與



劉昌祚皆爲涇原行營總管高遵裕節制而以兵會于靈武賊十萬餘扼我師麟引兵以出大破之遂以師抵靈武爲諸道先遵裕數日至方議攻城麟先登矢石下如雨氣益振城且拔會班師麟復以涇原兵爲後軍賊追躡慷慨激厲士眾爭出死力全師而還是役也涇原軍入爲前出爲殿戰嘗爲最而麟實將之後昌祚言靈武不克實受制非戰之罪朝廷問麟是非麟曰首至靈武昌祚之功城不能取皆臣之罪人以此多之麟字君瑞王韶取熙河知麟材可用爲熙河管界巡檢至是以功遷內殿承制辛亥置延州寨門浮屠二寨十二月壬午置延州義合寨

五年春正月庚子討敗師罪辛丑高遵裕責授鄧州團練副使本州安置种諤王中正劉昌祚並降官昌祚初爲通事舍人夏人以百餘騎寇劉溝堡昌祚出援夏人伏萬騎黑山外僞遁昌祚卒遇

之戰不解夏人銳甚大酋突而前昌祚抽矢一發殪之賊遁去自西事以來以寡禦眾未有如昌祚者李憲欲以開蘭會功贖後期之罪帝以憲有功但令詰其不待報命之由憲以餽餉不接爲詞釋弗誅

漁隱叢話東坡云張舜民芸叟邠人也通練西事稍能詩從高遵裕西征回中作詩二絕一云靈州城下千株柳總被官軍斫作薪他日玉關歸去路將何攀折贈行人一云青銅峽裏韋州路十去從軍九不回白骨似沙沙似雪將軍莫上望鄉臺爲轉運判官李察聞奏得罪貶郴州監稅

西夏紀事本末卷二十四

西夏紀事本末卷二十五

烏程張鑑

永樂失事

元豐五年春正月李憲既釋弗誅復上再舉之策詔以爲涇原經略安撫制置使知蘭州李浩副之三月壬寅鄜延路副總管曲珍敗夏人於金湯時夏人欲襲取新壘大治攻械知慶州趙高具上撓賊計虜寇蘭州高遣曲珍將兵直抵鹽韋俘敵千驅孳畜五千虜酋拽厥鬼名宿兵於賀蘭原時出盜邊高遣將李昭甫蕃官歸仁各領兵三千左右分擊耿端彥兵四千趨賀蘭原戒端彥曰賀蘭險要過嶺則砂磧也使賊入平夏無由破之選三蕃官各與輕兵五百使閒道出賊砦後邀歸路與賊戰賀羅平賊果趨平夏千兵伏發賊駭潰斬賊千生擒鬼名斬首領六獲馬七百牛羊老幼

三萬餘 夏四月知延州沈括奏遣曲珍將兵綏德城應援討葭蘆寨左右見聚羌落從之時李憲乞再舉伐夏丁丑始議五路舉兵五月种諤西討銀夏宥三州而不能守知延州沈括請城烏延古城以包橫山下瞰平夏使敵不得絕沙漠甲辰遣給事中徐禧及內侍押班李舜舉往鄜延議之六月辛亥朔環慶經略司遣將與夏人戰破之斬其統軍二人戊寅曲珍等敗夏人于明堂川初种諤以行軍紆道降文州刺史自以西討無功謀據橫山其志未已遣子朴上其策會朝廷命徐禧李舜舉至鄜延議邊事諤入對言橫山延袤千里多馬宜稼人物勁悍善戰且有鹽鐵之利夏人恃以爲生其城壘皆控險足以守禦今之興功當自銀州始其次遷宥州又其次修夏州三郡鼎峙則橫山之地已囊括其中又其次修鹽州則橫山強兵戰馬山澤之利盡歸中國其勢居高俯視

興靈可以直覆巢穴及禱至延州奏乞趣諤還諤在道禱已與沈括定議先城永樂堞乃上言銀州雖据明堂川無定河之會而故城東南已爲河水所吞其西北又阻天塹實不如永樂之形勢險阨請先城永樂竊惟夏宥三州陷沒百年一日興復實爲俊偉但建州之始煩費不貲若選擇要會建置堡砦名雖非州實有其地舊來強寨乃在腹心已與沈括議築砦堡各六自永樂堞至長城嶺置六砦自背岡川至布娘堡置六堡諤言若城永樂則夏人必力爭不可帝從禱議詔禱護諸將往城永樂括移庭並塞總兵爲援陝西轉運判官李稷主饋餉 秋八月禱度諤不可屈奏留諤守延州而自率諸將發延州蕃漢人萬役夫荷糧者倍之往築甲戌城永樂版築方興羌數十騎濟無定河覘役曲珍將追殺之禱不許九月甲申永樂城成卽永樂山川築新城共十四日而成距

故銀州治二十五里賜名銀川若徐禕等還米脂以兵萬人屬曲珍守之李稷輦金銀鈔帛充物其中欲夸示禕以爲城南就而中已實永樂接宥州附橫山夏人必爭之地禕等去九日夏人卽以千騎來攻曲珍使報禕禕不之信北邊人來告者十數禕遂與李稷李舜舉往援之留沈括守米脂時夏人三十萬已屯涇原禕曰彼若大來是吾立功名取富貴之秋也大將高永亨曰城小人寡又無水泉恐不可守禕以爲沮眾械送延州獄丙戌禕抵永樂夏人傾國而至號三十萬禕登城西望不見其際大將高永能曰敵性如獸不意而輒加笞叱則氣折不能害人若遲疑不斷縱其陸梁將無所不至今先至者皆精兵急與戰破之則駭散後雖有重兵亦不敢進此常勢也塵埃漲天必數十萬之眾使俱集則眾寡不支大事去矣禕岸然捋其髯謂永能曰爾何知王師不鼓不成

列永能退拊膺謂人曰吾不知死所矣禧執刀自率士卒拒戰夏人至者益眾丁亥夏人漸逼永能請及其未陣擊之又不聽乃以萬人陣城下坐譙門執黃旗令眾曰視吾旗進止賊分兵進攻抵城下曲珍陣于水際軍不利將士皆有懼色遂白禧曰今眾心已搖不可戰戰必敗請收兵入城禧曰君爲大將奈何遇賊不戰先自退耶乃以七萬人陣於城下俄夏人縱鐵騎渡河珍曰此鐵鶴子軍也當其半濟擊之乃可以逞得地則其鋒不可當也禧不從鐵騎旣濟震盪衝突大軍繼之時郟延選鋒軍最爲驍銳皆一當百先接戰敗奔入城蹂後陣夏人乘之師大潰將校寇偉李思古高世才夏儼程博古及使臣十餘輩士卒八百餘人盡沒曲珍與殘兵入城崖峻徑窄騎緣崖而上喪馬八千匹夏人遂圍城初沈括奏夏人逼永樂見官兵整乃還帝曰括料敵疏矣彼來未出戰



豈肯遽退耶必有大兵在後已而果然乙未詔李憲張世矩將兵  
救永樂又令沈括遣人與夏約退軍當還永樂地夏人圍永樂城  
厚數里游騎掠米脂且據其水砦珍士卒晝夜血戰城中乏水已  
數日掘井不及泉渴死者十六七至絞馬糞汁飲之夏人蟻附登  
城尚扶創格鬪括與李憲援兵及饋餉皆爲夏人所隔不得前种  
諤怨禱不遣救曲珍度不可支請禱乘兵氣未竭潰圍而出使人  
自求生禱曰此城據要地奈何棄之且爲將而奔眾心搖矣珍曰  
非敢自愛但敕使謀臣同沒於此懼辱國耳高永能亦勸李稷盡  
捐金帛募死士力戰以出皆不聽城中無水惟禱舜舉有水兩壺  
一日忽有于城下呼曰漢人何不降聞無水已三日矣禱以壺水  
揚于外以示人曰無水此何物也虜笑曰止于此矣夏人呼珍來  
講和呂整景思義相繼而行夏人髡思義囚之戊戌夜大雨夏人

環城急攻城遂陷孫昌裔勸永能從間道出永能歎曰吾結髮從  
事西戎職未嘗挫今年已七十受國大恩恨無以報此吾死所也  
願易一卒敝衣戰而死徐禧李舜舉李稷皆莫知所爲城既陷舜  
舉以敗紙半幅筆摘略數十百字以燭蠟固之付有司以上實遣  
奏也云臣舜舉死無所恨但願陛下勿輕此賊李稷將死亦書紙  
後云臣稷干苦萬屈上得之不勝悲涕者累日是時敵人雖入月  
城而未偏左右以馬御舜舉舜舉以鞭揮擊不月上馬少頃偃蹶  
人猶見之李復上馬將出門失轡或云面上中箭在獲城內夜黑  
沸濤中面上中箭恐非敵人也獨徐禧不知所歸或云有還人見  
之夏國者惟曲珍王湛李浦呂整裸跣走免蕃部指揮馬貴獨持  
刀殺數十人而死夏人燿兵于米脂城下乃還舜舉資性安重與  
人言未嘗及宮省事 冬十月戊申朔沈括种諤奏永樂城陷蕃

漢官二百三十人兵萬二千三百餘人皆沒帝涕泣悲憤劉昌祚言永樂之敗一日失馬七千匹不知平時費幾何而致是寧不惜哉或言緣是役而死者亦十餘萬人云城下沙爐中大小團茶可拾也乃是將以買人頭者乙丑詔贈永樂死事臣徐禱李舜舉李稷高永能高品張禹勤官禱舜舉並諡忠愍永能子世亮錄爲忠州刺史

六年春二月丁未夏人數十萬眾奄至圍蘭州已據兩關李浩閉城距守鈐轄王文郁請擊之浩曰城中騎兵不滿數百安可戰文郁曰賊眾我寡正當折其鋒以安眾心然後可守此張遼所以破合肥也乃夜集死士七百餘人縋城而下持短刃突之賊眾驚潰爭渡河溺死者甚眾時以文郁方尉遲敬德擢知州事是月帝賜李憲詔曰西賊首領最爲兇黠者惟仁多陵丁而自來多於本國

西南邊出入料彼方蕃部必能有識其狀貌者宜多方選委將佐  
廣募蕃兵有能別識之人令密結敢死儕類遇事謀生擒致之不  
然斬首前來當以團練蕃部鈐轄及皇城使蕃兵將官酬之丙辰  
彰李憲爲經略安撫都總管以王文郁爲西上閤門使代李浩知  
蘭州三月卒卯夏人寇蘭州副總管李浩以衛城有功復隴西團  
練使丙申河東將薛義敗夏人于葭蘆西嶺己亥河東將高永翼  
敗夏人于眞卿流部 夏四月甲子李浩敗夏人于巴義谷五月  
夏人寇蘭州圍九日甲午大戰侍禁韋定死之尋又入寇麟州虜  
將郭忠紹敗之又寇麟州神堂砦知州訾虎躬督兵出戰敗之詔  
虎自今毋得輕易出入遇有寇邊止令裨將出兵捍逐恐失利損  
威以張虜勢復賜李憲詔曰近麟府鄜延環慶涇原路探事人言  
西賊已點集河南北諸監軍司人馬或稱十分中五或稱九分

並要于十二月十五日葫蘆河取濟雖作過路分未知其的然聚  
兵去處必是委實不可不廣爲枝備

西夏紀事本末卷二十六

烏程張鑑春治甫著

四岩之還

元豐六年夏閏六月乙亥朔夏主秉常遣使來貢永樂之役夏人亦以困敝于兵令西南都統昂星嵬名濟移書示涇原劉昌祚乞通好如初昌祚以聞帝諭昌祚答之及入寇屢敗國用益竭乃遣謨箇咩迷乞遇來貢上表曰臣自歷世以來貢奉朝廷無所虧怠至於近歲尤甚歡和不意憮人誣開朝廷特起大兵侵奪置土城砦因茲構怨歲致交兵今乞朝廷示以大義特還所侵倘垂開納別效忠勤通遐域之貢輸庶生民之康泰帝賜詔曰朕以爾膺受封爵世爲藩臣職貢之修歲時無怠朝廷待遇恩禮加隆頃以橫強敢行廢辱達於子聽良用震驚嘗令邊州就往移問置而不報

繼犯曩陞王師徂往蓋討有罪義存拯患非獲已焉今者遣使造  
廷辭禮恭順仍聞國政悉復故常朕心釋然深所嘉納已戒邊吏  
無輒出兵爾其遵守先盟永勵臣節永綏寵祿庸副眷懷帝令錄  
不付李憲戊寅復詔陝西河東經略司其新復城砦徼巡毋出一  
三里夏之歲賜悉如其舊惟乞還侵曩不許 冬十月癸酉朔夏  
國主秉常遣使上表請復修職貢乞還舊曩帝賜秉常詔曰惟爾  
祖考介居邊陲蒙恩朝廷享有爵土拊循備厚歷年滋多昨者王  
師出征義存拯患謂宜委戈而聽命敵愾以奏功豈虞靡思弗喻  
朕志殺害吏士捍拒甲兵問罪正名方圖再舉迨使辭之效順聞  
國政之復常旋納懇誠許修貢職遽披來奏論請故曩朕惟蕃服  
不恭削地示過資於故實匪朕所私爾其審思厥終務體至意所  
言地界已合郵延路移牒宥州施行其歲賜俟地界了日依舊

七年春正月癸丑夏人寇蘭州甲寅賜李憲詔曰西賊雖已傷敗  
散去然兇酋人多陵丁倔強任氣深慮恥于傷殘不快所欲忿不  
思難出我不意其人如犬彘乘隙忽有奔衝不可不念宜多方廣  
布斥堠督責守將無怠防虞仍頒弓箭火礮之類百萬有餘以備  
禦賊初李憲以夏人數至蘭州河外而翱翔不進意必大舉乃增  
城守之備經略安撫使劉昌祚以鄜延自義合至德靖砦綿互七  
百里堡砦五十餘疎密不齊燧燧不相應昌祚立爲定式凡耕墾  
訓練戰守屯戍度強弱分地望圖山川形勢上之至是果大舉入  
寇步騎號八十萬圍蘭州意在必取督眾急攻矢如雨雹雲梯革  
洞百道並進凡十晝夜不克糧盡引去城外得賊尸五萬昌祚乃  
遣姚兪趨宥州王慙趨納乞會拒之又寇塞門安遠砦復遣米斌  
拒之夏四月癸巳夏人寇延州安寨堡將官呂眞敗之復詔李



憲曰蘭州大眾傷敗之餘土氣摧喪在理可知兼兇酋人多陵丁  
殘忍虐用其人今既不能如欲上則必得罪於國中下須逞其躁  
心六月丙子夏人寇德順軍巡檢王友死之 秋九月乙丑夏人  
圍定西城燒龕谷族帳熙河將秦貴敗之 冬十月夏人寇熙河  
乙未夏人寇靜邊若涇原鈐轄彭孫敗之十一月朔丁酉寇清邊  
砦隊將白玉李貴死之甲辰夏國主秉常遣使來貢

八年春三月帝崩 夏四月庚辰知太原府呂惠卿遣步騎二萬  
襲夏人于聚星泊斬首六百級 冬十月甲子夏國遣使進助山  
陵馬匹丁亥以夏國主母喪遣使弔祭十二月夏人以其母遺留  
物馬白駝來獻

哲宗元祐元年春二月庚午禁邊民與夏人爲市庚辰夏國遣使  
來貢 夏五月庚申夏國遣使來賀卽位六月夏主遣使來求蘭

州米脂等五砦初神宗于熙河路增置蘭州鄜延路增置寨門安  
疆米脂浮屠葭蘆五寨上卽位夏國纔遣使來賀登極還未出境  
又遣使入界朝廷知其有請地之意然棄守之議未決知陳州韓  
維言先帝以夏國主秉常受朝廷爵命而國母擅行囚廢故興兵  
問罪今國母死秉常復位所請恭順有藩臣禮宜復還其故地以  
成先帝聖恩因陳兵之不可不息者有三地之不可不棄者有五  
使人至見于延和殿輒妄奏曰神宗自知錯上起立怒久之內侍  
張茂則曰與押伴理會移時方退于是孫覺首議棄蘭州 秋七  
月乙丑夏國主秉常殂是年改元天安禮定國人謚曰康靖皇帝  
廟號惠宗墓號獻陵子乾順卽位庚午夏國遣使來賀坤成節  
冬十月壬辰夏人來告哀初秉常遣訛囉聿求蘭州米脂等五砦  
神宗不許及帝卽位秉常復遣使來請司馬光言此乃邊鄙安危

之機不可不察文彥博與光合太后將許之光又欲併棄熙河安  
燾邢恕固爭之光乃召禮部員外郎前通判河州孫路問之路挾  
輿地圖示光曰自通達至熙州纔通一徑熙之北已接夏境今自  
北關瀕大河城蘭州然後可以扞蔽若捐以予敵一道危矣光乃  
止姚麟奏書以爲夏人逐其君王師是征今秉常不廢卽爲順命  
可因以息兵矣獨蘭會不可與願召諸將帥飭邊備示進討之形  
以絕其望朝廷是其議兵出殺胡平而夏兵壓境麟屯兵瓦亭賊  
逼靜邊麟將兵以待賊至邀擊之賊遁去會秉常卒遣使來告哀  
詔除元係中國及西番舊地外自元豐四年用兵所得城砦待歸  
我永樂所陷人民當盡畫以給還遣穆衍張楙往弔祭衍奏以爲  
蘭奔則熙危熙危則關中震唐自失河湟西邊一有不順則警及  
京都今二百餘年非先帝英武孰能克復若一旦委之恐後忠益

滋悔將無及矣議遂止又詔諸路探報自秉常身死梁氏族人侵  
擅國事遂致諸部酋豪往往不服變亂交攻日相屠害若有投來  
西人仰相度可否收留仍更切厚與賞物募人遠探目今邊情向  
去利害縷細詳究措置間奏庚子詔曰故夏國主嗣子乾順惟爾  
先人世修職貢計音忽至愍悼良深想與諸臣同增悲慕惟忠可  
以保國惟孝可以得民各祇乃心以服王命十二月十六日太皇  
太后弔慰詔曰詔夏國主嗣子乾順念爾守邦藐然在疚日月逾  
邁祖葬有時緬懷孝愛之深想極攀號之戚往助襄事式昭異恩  
今差供備庫使張楸充弔慰使兼賜安葬故夏國主物色具如別  
錄至可領也故茲詔示想宜知悉冬寒汝比平安好遣書指不多  
及太皇太后祭奠詔曰詔故夏國主嗣子乾順惟我列聖眷爾有  
邦非徒極其寵榮亦與同其憂患念爾哀疚惻然願懷臨遣行人

往諭至意且致奠贈之禮以爲存沒之光今差朝奉大夫尙書金部郎中上輕車都尉賜紫金魚袋穆衍充祭奠使兼賜故夏國主贈奠物色具如別錄至可領也故茲詔示想宜知悉冬寒比平安好遣書指不多及二十四日乾順進奉賀正旦馬馳至使回賜詔曰詔故夏國主嗣子乾順省所差人進奉賀正馬馳共一百頭匹事具悉遠奉王正來歸時事惟此充庭之實率皆任土之宜乃眷忠勸良深嘉歎今回卿銀絹茶等具如別錄至可領也其差來人所賜物色亦具賜目故茲詔示想宜知悉春寒比平安好遣書指不多及又大皇太后詔曰詔故夏國主嗣子乾順省所差人進奉賀正旦馬馳共一百頭匹事具悉述職春朝歸誠宰旅修此效牽之禮致其乘服之良再闕來章式嘉忠節今回賜卿銀絹茶等具如別錄至可領也其差來人所賜物色亦具賜目故茲詔示想宜

知悉春寒汝比平安好遣書指不多及乾順復進謝恩馬馳回詔曰詔故夏國主嗣子乾順省所上表進謝恩御馬一十匹長進馬二百匹馳一百頭事具悉臨弔之重以寵世臣恩報之深復馳來介載閱充庭之實備形述職之心乃眷忠勤不忘嘉歎其差來人所賜物色亦具賜目故茲詔示想宜知悉太皇太后詔曰同遣行人往賻襄事繼陳方物來奉謝儀惟忠可以附民惟禮可以定國勉終誠節以副眷懷時梁乙埋數擾邊延安帥趙高知賊將入寇檄西路將劉安李儀曰賊卽犯塞門汝徑以輕兵擣其腹心已而果然安等襲洪州俘斬甚眾夏人入貢旣而以重兵壓境諸將亟請益戍兵爲備高徐諭之曰第謹斥堠整戈甲無爲寇先戍兵不可益也因遣人詰虜虜遂潰去乙埋終不悛高使間以善意問乙埋何苦與漢爲仇必欲寇第數來恐汝所得不能償所亡洪州是

也能改之吾善遇汝遺之戰袍錦綵自是乙埋不復窺塞因復縱閒國中遂疑而殺之

二年春正月夏國以其故主秉常留遺物遣使來進乙丑宋遣劉奉世崔象先齋冊封乾順爲夏國主如明道二年元昊除節度使西平王例冊曰皇帝若曰於戲堯建萬邦黎民時雍周立五等重譯來賀此帝王之所同而國家之成法也咨爾乾順惟我列聖眷乃西陲錫壤建邦衛于王室保姓受氏同於宗盟爵命褒嘉恩體甚渥今爾承其胄緒紹茲蕃屏而能事上欽肅飭躬靖虔申遣使人來陳方物達于朕聽深惟汝嘉是用稽酌典故表顯寵名錫爾以茆土之封加爾以服乘之數誕頒丕冊以鎮一方今遣朝奉大夫起居郎直集賢院上輕車都尉賜紫金魚袋劉奉世崇儀副使上騎都尉安喜縣開國男食邑三百戶崔象先持節冊命爾爲夏

國王承爲宋藩輔夫篤於好德乃克顯先忠於戴君承膺福祉往  
祇明命無忝予一人之猷訓夏人復以地界爲詞三月夏國遣使  
來謝封冊宥州送到陷蕃人三百十八口因分畫西夏地界詔鄜  
延經略司候到日葭蘆米脂浮屠安疆四寨並特行給賜其餘不  
係可還城寨地土各委官畫定界至開立壕堦 夏五月癸丑夏  
人及西蕃酋鬼章圍南川砦遂城洮州遣游師雄行邊 秋七月  
夏人寇鎮戎軍諸堡劉昌祚等禦之而退八月癸巳詔夏國政亂  
主幼失藩臣禮皆強臣梁乙逋等擅權逆命其君民非有罪也興  
師討伐有所未忍諸路帥臣宜嚴兵自備如能洗心效順與之自  
新辛丑涇原路言夏人寇三川諸砦官軍敗之九月己未夏人寇  
鎮戎軍尋遁去時西邊稍寧而近塞時苦寇掠 是歲夏改元天  
儀治平時梁乙逋用事久得前後所積歲賜金帛輒語人曰鬼名



家人管事有此功否我之所以連年點兵者欲使宋朝憚我而爲  
國人求罷兵耳

三年春三月乙亥夏人寇德靜砦將官張誠等敗之 夏六月辛  
丑夏人寇塞門砦朱贊郝普等死之

四年春正月甲申以夏人通好詔邊將毋生事二月乙卯夏國主  
遣使來謝封冊 夏六月夏遣使來貢戊申賜夏國詔曰省所奏  
事具悉所有蘭州塞門兩處地土前詔批述已明毋復更有論請  
其永樂陷沒人口緣自牒報後來經隔歲久慮其閒實有死亡或  
後來卻有續尋到人數今已降指揮下郵延路經略司候將來送  
還到日若與元報人數不同亦令據今割計口支與賞絹仍將葭  
蘆米脂浮圖安夏四寨約一日給賜所有應合立界至去處並依  
已降朝旨及自來體例計會郵延路經略司關牒逐路帥臣各委

官隨宜相度認定守把不得更相侵越丁巳又賜詔曰省所奏昨  
差人赴延州計會將永樂等人口及所還四處城寨交換塞門蘭  
州兩處地上實在朝廷酌中裁決事具悉爾嗣守世封虔修貢職  
頃屬罷兵之後繼陳復地之言累降詔音備諭朕志豈謂歷時之  
久尙稽閭命之行忽覽奏封深亮誠款願改圖之議猶有披陳然  
事大之恭實聽裁決再惟忠順殊用歎嘉雖易地之求當一遵於  
前詔而酌中之請宜別示於優恩除漢蕃地土指諭已明難復換  
易外所有歲賜據前降詔命合候地界了日依舊今推特恩已勅  
有司更不候地界了當便仰檢會依例施行爾其體朝廷恩信之  
隆謹封疆慎守之戒永思安靖用保悠長初朝議以米脂等四寨  
與夏人權涇原經略劉昌祚以爲不可不報旣而夏國宥州牒已  
刷到陷沒人口尋有旨給四寨仍約以委官畫地界至是夏國遣

使入貢樞密院擬答曰蘭州塞門兩處地前已明言毋復更請將來送永樂人口慮歲久死亡與元報人數不同亦計口支給償絹仍將四寨給賜詔邸延趙高主分畫之議熙河帥范育請先畫界界後歸四寨高不以爲然

五年春二月己亥夏人來歸永樂所掠吏士百四十九人遂詔以米脂葭蘆浮圖安疆四砦還之夏得地益驕仍約以委官定疆界夏六月夏人寇質姑勝如二堡 秋七月乙酉夏人來言畫疆界者不以綏州例詔曰爾逃領蠻畿恪循世守佯來稱幣廷閱奏書永言疆場之安未卽溝封之畫兩界繩直罄忠順而可嘉千里蕪荒瀝誠忱而有請力祈務許蚤遂底寧惟析壤之求初無故事念安邊之議亦旣累年顧省恭勤特行開納然綏德城本無存留草地詔自今旣欲於漢界留出草地卽於蕃界亦當依數對留應

見今合立界至處並須明立封堠內外漢蕃各對留草地十里不  
令耕種仍各於草地以裏自擇安便處修建堡鋪如熟地內不可  
修建卽於草地內修立各不得逼近界堠其餘量畫未盡事已令  
押作官委曲開諭進奉使副訖及已詔鄜延路經略司夏國如欲  
議事許差人赴延州計議眷方陞悅義之心旣輸惴惴而朝廷綏  
遠之意已示優容宜深體於恩懷亟保和於封略

六年夏四月辛丑夏人寇熙河蘭岷鄜延等路時知熙州范育言  
朝廷昨詔本路與夏國分畫自定西以北二十里與秦州隴諾堡  
界一抹取直及質孤勝如堡外亦打量二十里本路再陳汝遮形  
勢及一抹取直等處各乞隨本路利害分畫亦蒙許令與夏國商  
量然夏國自去年舉兵攻質孤勝如二堡及指隴諾取直等之事  
以爲翻異又云南朝實有就和之意請勿再說及隴諾堡上取直

及二堡之事其言詞簡慢不遜況無質孤勝如則金城必危無定西以北之地則定西必危金城危則熙州有奔衝之虞定西危則通遠有掘亢之患二州危則賊可攘臂于中河岷焉得而守也臣望朝廷無以今日之不用兵爲可安而深爲異日虞奏至執政會議蘇轍曰頃與夏人商量地界欲用慶曆舊例以漢蕃見今住坐處當中爲界此理最爲簡直夏人不從朝廷遂不固執蓋朝廷臨事常患先易後難此先易也旣而許于非所賜城寨依綏州例以二十里爲界十里爲堡鋪十里爲草地非所賜城寨蓋指延州寨門義合石門吳堡蘭州諸城寨及通遠軍定西城要約纔定朝廷又要于兩寨界首相望侵係蕃地一抹取直夏人暋勉見從要約未定朝廷又要蕃界草地更留十里通前三十里夏人亦又見許凡此所謂後難也今者又欲于定西城與秦州隴諾堡一抹取直

所侵蕃地凡百數十里此不直致寇之大者也 秋八月癸未詔  
鄜延路都監李儀等以違旨夜出兵入界與夏人戰死不贈官餘  
官降等乙卯夏人寇懷遠砦閏月夏人寇麟州及神木等寨眾十  
五萬諸將不敢與戰蕃漢居民爲所殺掠焚蕩廬舍驅擄畜產甚  
眾九月丁亥夏人寇府州壬辰詔州民爲寇所掠廬舍焚蕩者給  
錢帛踐稼者賑之失牛者官貸市之丁酉詔歲出內庫緡錢五十  
萬備邊費 冬十二月夏人犯邊知太原府范純仁自劾禦敵失  
策詔貶一官徙知河南府 是歲夏改元天祐民安

七年春二月丁卯詔陝西河東邊要進築守禦城砦 夏五月  
李諾平城賜名定遠城初熙河分界議久不決遣陝西轉運使穆  
衍往視請介兩壘之間城諾平以按要害至此始成 秋八月己  
未詔西邊諸將嚴備毋輕出兵九月己酉永興軍蘭州鎮戎地震

冬十月庚戌朔環州地震丁卯夏人寇環州

八年夏四月丁未朔夏人來謝罪請以蘭州易塞門安遠二砦以  
違順不常卻其請庚申詔曰省所上表遣使詣闕悔過上章及賦  
納蘭州一境地土綏州至合儀寨亦取直畫定卻有塞門乞蠲賜  
夏國等事具悉朕統御萬邦敦示大信眷爾嗣蕃之始亟馳請命  
之誠爰給土疆復頒歲幣豈謂受賜而往輒興犯順之師中外交  
章神民共憤朕以爾在位未久勢匪自由姑戢伐罪之大兵聊用  
禦邊之中策仍策疆吏許爾自新今則遣使來庭託詞悔過何乃  
謝章之初達遽形畫境之煩言況西藩故疆中國舊地已載前詔  
不係可還其分界雖曾商量在用兵亦合隔絕然則塞門之請殊  
非所宜定西以東已有前論除河東鄜延路新邊界至許從前約  
令逐路經略司依前亦已令蘭岷經略司依先降朝旨委官候夏

國差到官詳先降指揮同共商量分畫緣夏國自元祐通貢受賜  
後來累次犯邊仍候諸路地界了日可依前別進誓表然後常貢  
歲賜並依舊例六月夏人自得四砦累遣使以地界爲言詔二府  
議

紹聖元年春正月丙申夏國遣使來貢二月夏國進馬助太皇太  
后山陵復遣使再議易地詔不允

二年秋八月詔熙河蘭岷鄜延河東路地界令諸路沿邊當職官  
司更不商量分畫只以巡綽卓望處把守牒報夏國先是元祐司  
諫議大夫孫覺議棄蘭州其後司馬光謂此數砦者田非肥壤不  
可以耕墾地非險要不可以守禦欲因繼統悉皆毀撤歸其侵地  
劉摯謂供給戍守窮竭財力其最大者莫如蘭州不若捐一空城  
與之至於鄜延河東等路近置堡砦深詔大臣早有定計趙鼎欲



留塞門安遠二砦其餘或存或廢乞密降畫一付臣遵守呂陶謂實於邊防無分豪之益范純粹謂收復故砦廢州略無所制乞令以虜陷官吏丁夫悉歸朝廷而所削之地並從給賜純仁之論亦然蘇轍謂增置州砦坐困中國願決計棄之王存謂夏國疆地終久難守王岩叟謂自有葭蘆吳堡兩砦守之無所得棄之不足惜文彥博謂邊臣欺罔爲國生事第恐不能持久卻須自棄不若推恩賜予至是章惇爲相以爲十年之間含容備至而夏人犯邊如故遂罷熙河等路分畫地界蓋章惇曾布方謀用兵故先勸上罷分畫開邊自此始